

四庫全書

集部

欽定四庫全書

集部

明文海卷四百三十三

詳校官起居注主事臣顧宗泰

主事銜臣徐以坤覆勘

總校官庶吉士臣倉聖脉

校對官中書臣潘奕雋

謄錄監生臣胡澄

欽定四庫全書

明文海卷四百三十三

餘姚黃宗義編

墓文五

文苑

江西按察司副使空同李君墓誌銘

崔銑

弘治中空同子興陋痿文之習慨然奮復古之志自唐而後無師焉已汝南何景明友而應之空同子之雄厚仲默之逸健學者尊為宗匠又咸激厲風節敢上直諫

安於冗散鄙忽驟貴空同子方雅簡默稍飭廉棱仲默
恬淡溫孫不露方美公空同子諱夢陽字獻吉慶陽人
徙大梁南冠舉弘治癸丑進士授戶部主事再遷至郎
中才敏氣雄簿書外日招集名流為文會酬倡講評遂
成風致常監三關招商用法嚴格勢人之求被搆下獄
尋得釋每抗疏言出令不平官府殊法一涉宦戚即尼
不問不報乙丑應詔陳二病三害六漸之弊末言皇親
橫則外戚驕恣之漸為掩義之害張侯辯愬摘奏中張

氏字為訛母后遂令回話乃列張侯不法狀悉實可按
遂下獄衆為卓卓已僅奪俸三月上語尚書劉大夏曰
朕欲寘夢陽輕典左右謂當廷杖渠忿則泄如朕殺諫
臣何正德改元八閹導上燕遊閣臺部諫協請誅之不
克閹遂竄斥諸臣已知部之奏實空同子贊成奪官降
山西布政司經歷致仕戊辰劉瑾必快前忿羅以他事
械赴京人意其必死是時瑾敬禮修撰康子康子謂瑾
曰李生能法皇祖為之殺之大失天下言學者望瑾嬖

人姜達亦申理瑾乃賢空同子既釋繫又欲用之選部
空同子託以痼疾康子為力請得免卒未瑾誅起為江
西副使提學勅許舉聞重事空同子振學泣士外大有
建白臺使及同官者病其侵官空同子非其隳職各起
訟當路素忌空同子才名落職閒住要辭曰臨官不尚
云爾聞者笑之曰斯以虞之臣責過空同耶寧庶人方
蓄異圖威劫諸內省臬受制知空同子不可撼陽下之
及庶人叛滅有言空同子亦疑於黨附者當路又將陷

以法司寇見素公不可止空同子以成化壬辰十二月
七日生嘉靖己丑九月二十有九日卒享年五十八配
左氏子一枝舉進士由主事佐官州同知側室宋子三
楚梁柱桂女一王一女枝四子一夔二典三謨四維女
一葬大陽山左宜人明空同子家世自有譜所著詩文
集若干卷空同子八篇銘曰伊天閱之伊人嫉之專方
者礙固正則危隱約委蛇于河之湄大昌厥嗣永式來
思

殷近夫墓誌銘

崔銑

殷氏鳳陽大族也元末有諱仲名者避亂東平因家於
壽張仲名生尚文尚文生勝勝生鐸鐸生玘號剛齋以
貢士為昌黎令剛嚴多知民畏愛之剛齋娶張氏繼室
以任氏皆不孕子乃內李氏孕七月生近夫既長脩眉
碧目口可容拳體羸而骨健讀書數行下既成誦終身
不忘年二十有六舉弘治乙丑進士明年以疾歸卜居
石川作蓄艾堂聚書數千卷旦夕誦思欲以作者自名

著書十餘篇正德辛未病愈還京師授靖江知縣近夫
明察有斷不勞而治薊盜過淮渡江掠常州將如靖江
近夫有備盜謀知之乃如江陰近夫發兵追之江陰得
完常守檄近夫修郡城又自修學宮費省而工堅民朱
鎧死于文廟西廡中莫知殺之者忽得匿名書曰殺鎧
者某也鎧素讐其人衆謂不誣近夫曰此嫁賊以緩治
也密問左右與鎧狎者誰對曰胥姚明近夫乃集羣胥
於堂曰吾欲寫書各呈若字視明字類書詰之曰爾素

狎鎧殺之何故明大驚曰鎧將販于蘇獨吾餞之利其
貲故殺之耳近夫歎曰利重忘親交非其道者必凶嗟
乎嗟乎乃殺明癸酉調青田青田劇邑也近夫去其害
民者六七事他無所更張近夫雅好游眺川壑覽物歌
詠靖江青田有大江孤山混元峯每暇輒出嘯詠其間
曠然自得乙亥考績如京師青田民號泣而送之吏部
以最聞選授南京工科給事中上疏言事者五曰清弊
蘇民曰安重地曰防奸微曰除邪以全治曰公賞罰既

病封其疏題曰理真事曉意中詞訓付母言曰茲以歸
雲霓弟遂卒丙子七月七日也享年三十有七近夫諱
霄號石川娶岳氏男子一人曰昇女子三人初剛齋卒
近夫則禮治喪既卒服始冠將婚與其妻之父母約必
如昏禮乃舉後又考訂古今祭禮行之唯謹故魯人多
執禮者近夫愛誦程氏朱氏書其為文非秦漢人語不
習又以詩者抒情表志風人所善自漢魏至唐作者皆
辨其音節而擬之作古樂府四百篇集志彙錄金僕姑

數十卷又覽莊周書說其達性善喻最後自病太博必
六經之旨然後究心焉近夫方峭克約國子司業穆伯
潛篤行苦學無匹也猶畏近夫曰近夫之耻不善不啻
負穢近夫居常不談人過及論文則指摘疵瑕不以一
言假人葬於石川之南會者千人咸哭之失聲銘曰嗟
我友行如壁文孔曄明有儒垂世模

杭州知府呂君表

崔銑

弘治辛酉予游大學廣人梁宗烈與予善宗烈亟稱承

豐呂祖邦曰明爽有氣節能效唐人詩已而予識呂君
又得其經學其研究密會意註外經義簡明發越無他
長語時孝皇有道之朝卿大夫怙恩耽寵菴不知退清
議鄙之呂君作落葉詩寓風刺曰千山落處偏於曉一
片飛來即是秋又曰天南天北堪容汝莫送多情出御
溝都士傳誦壬戌春試正卷公掄之作魁吳文定升其
次卷魯文恪鐸也君名第九入對策賜第二甲進士八
月授南虞衡主事分司真州釐禁削冗因以救荒貧民

皆受分司雇役錢負傭視其力以品其食不得籍記而
勾稽之作義塚以瘞殍已自莅祭泣感左右益以其暇
攻詩似唐王維自題曰近來官舍清如水更喜官清水
不如真州士曰無愧詞後遷員外郎又遷南文選郎中
予亦來為封部主事與呂君為寮講肄故聞抄集往史
南選閒曹也而呂君考覈詳嚴申敕典制劉鐵柯在司
寇時恃其與援陵壓諸曹常為撥厯呂君遺文責難之
人皆喜君之直而快鐵柯之挫也君配婁氏一齋先生

子邑博之女號水溪一齋莊敬切實精貫性言化孚家
人迪蹈彝典而婁安人解經書全貞懿呂君得內友之
助士有售欺於名公者致譽籍甚予贈之言呂君臥牀
上誦之安人曰是文有大意存焉人炫名無不敗露者
猶文壁然日就湮剝吾聞之吾大父云次日呂君語予
服其識正德庚午呂君晉杭州知府抗自前宋來為麗
地習尚奢逸遨樂過客厨傳上官供億曷有極限呂君
一切裁削志在教化御史張承仁恃才頤使各司獨於

君加禮御史他日告予曰呂君不但氣不降而乃無隙
頃之甫八月以憂歸丁母走赴銓將以君守寧國有仇
家之訟君固請終訟歸家其仇健險而所告事人糾紛
織練踰年乃白君築室山水之間不求仕己卯闕十

八而卒呂君大父晟景泰辛未進士終夔州知府有愛
浹民因名呂君曰夔父祥舉人封主事母俞氏繼母姜
氏婁安人治家政如君存時二子振武振芳孫一大衍
安人有教各業儒嗟乎古之司刑者兩造俱至三訊即

施或懲惡或白寃不踰時而定示民以中吉也後世首
鼠之徒持兩解之說淹留歲月壯士負屈而死富人終
訟而貧而造誣之凶得志矣如呂君者邦之良民之主
所須如水火而訟久未白予時承乏太史未嘗不含憤
疾言於當路者而亦未如之何嗟乎可恨哉

吳泉亭墓銘

許相卿

嘉靖一十四年二月乙卯朝列大夫廣西布政司左參
議泉亭先生吳君卒訃予予扶而哭諸門君之子鄉舉

士遵晦郡博士諸生遵道書君顧言來曰知我者許子其託之識我臧噫嗟已乎吳君速死予信忍以疾為解志曰吳君諱鼎字維新錢塘城北隅人也父宗裕封承德郎刑部主事母陸氏繼母戚氏妻顧氏贈封並安人咸以君故君少慧嗜學父母念獨子重苦之交禁弗為止選錢塘文學弟子貞朗秀駿踔氣蓋一時衿佩少年諸司勸學較藝輒皆取君冠其曹君正德中進士釋褐試吏尹臨淮臨淮帝鄉壯縣民多優復習游惰公私玩

敝謾偷政廢不舉糾紛倍十于小邑宿吏側目少君君
穎敏識裁便宜張弛更以辨治稱監司使者僉上君治
行異等堪風紀選不報毅皇帝南征侍衛中外諸臣騎
乘數十百萬所過縣次續食有柄事中貴人道臨淮非
分征索供具無厭橫甚君從民事往致常饋不去中貴
人大動望憤詬呼梃君銳身先民事當之民事爭前衛
君擊傷中貴人奏逮君凡詔獄一歲而後廷議白君還
治用舉者徵為南京刑部主事展南京兵部主事以承

德公喪罷歸除喪謁告不仕者十有五年用舉者補南京兵部員外郎展南京禮部郎中遷廣西布政司參議乞侍養亡何病卒年五十三君方病甚二僮奴擁之坐氣漸微而神不亂忽左右視曰爾執誰耶吾其死於吾兒之手二子舉扶代之若將寐者而絕君起寒約性鯁諒力學自立危行不疑恥媵阿苟同孤立行一意而已俗咸病其不諧以哆憎口然居約奉繼母當其心裝嫁四女弟甚周與人謀必為之盡當官事關利病直往敢

任不顧計前後故所至舉職大節斷斷士亦以此多之
一時顯望魁人往往折輩行與之交然仕不充志壽不
盡年懷挾其所未究溘然長終已知君者莫不傷懷垂
涕云君生好文特甚其為臨淮罷劇猶手一編吾伊空
堂中治當南北遠途過客時有中原文獻家博文好古
諸名士大夫君輒委已交歡與相下上其論既謝病屏
居愈益專力萃精償其積志六籍而下九流諸子策士
春秋先秦盛漢之譔古金石竹簡之傳旁逮外家雜說

譎誕怪迂之語凡竒古文字罔不雋飮醇酣江左北朝以還唐宋近代諸名家亦皆挾藩入與神詣作者故其文深涵大放瞻蔚闕肆能盡達其意所欲言淵乎蒼然有西京氣骨君卒歲一訪予紫雲山中坐語移日扼腕論文灑灑弗能休予曰雅哉辯然藝事末耳吾棄弗事此也久矣君素多病奈何敝精以徇末孰與斂英沃根疏神以貴而生乎君憮然離席曰愛我哉陳義甚高僕將從于於忘言矣然君文聲籍甚紹介屬筆者彌衆不

容自解免焉每一篇出學生爭傳諷之郡諸老先生辯博能言者皆自以為弗及也時有紀述莫適自任必推泉亭云二子好學世其家女一孫男從周從時女一墓在積慶山南麓葬之日是歲十二月戊申銘曰有崇斯封有坎斯宮有斐君子歸藏於中有氣隆隆湖天亘虹後有王朔氏揚袂障日而望之曰咄咄佳哉其下殆古之人以文雄者乎

楊僉事墓銘

許應元

楊君諱祐字汝承一字晉卿世為蘭谿楊塘著姓曾祖永政徙嚴之建德祖莆田丞大昇再徙錢塘於是為錢塘人父象明易學為錢塘學生已而棄去教授閭里間然鄉人目之必曰善人也夫人郎氏是生君君生六歲能為詩歌十歲受父學易十七補縣學生十九當嘉靖元年領浙江鄉試貢入京師道鄒魯之墟過稷下周游渤碣之間登郭隗之臺慷慨悲懷有統揖千古之意已而罷歸治一室河壩散列羣籍流覽其中而專覃思於

經術於是君之學益深博矣八年登進士第覆試月初
生賦改翰林庶吉士明年除知興國州考薦輒最入為
刑部員外郎遇謫出知濮州稍遷濟南府同知十八年
擢江西按察司僉事復以謫待次家居歲餘調補湖廣
僉事二十二年七月十日暴疾卒于官年止四十先是
江西巡撫今司徒王公薦君文行卓偉宜令董學官當
有以風厲人士其後湖廣部使者又薦君器用堪兵備
皆報聞及卒士大夫交相弔曰嗟乎楊子在何不可為

者今已矣初弘治間海內淳濯搢紳先生翕然興于學
厭時俗頽簡踔厲振迅務撫先秦西京之書而詘唐宋
當是時北地李獻吉尚型范而信陽何仲默貴竊眇號
稱復古天下鄉風矣大江以南文章輿區也於杭則故
翰林修撰江君景亭參議吳君維新及君生後崛起雄
視中土君初與計吏上京師也吳君嘗論叙送之以為
賈生明國體而匡衡推經術紹茲哲軌其在楊生君亦
獨喜自負為文章奔放陵轢若馳車九折之坂而河決金

隄莫之禦也其議論雄辯勇決颯起泉涌卒然聞之駭
汗愕視其他才用更自天性他人縮卹已獨奮前研發
穎脫勞不見曹伍然終以此見媚疾羣擠偶踣蹶益騰
距豈非琦瑋卓絕不羣之士哉君嘗自謂仕宦居職無
以逾人使得當一校之任率先士大夫能使人趨死不
顧乘邊守塞雖不敢邀一旦功然敵不足畏也時時以
謂予嗚呼今則死矣借令無死其所自樹將不與古所
謂豪傑者並驅乎雖使遭尤被謗退處岩穴固當託志

儒雅成一家之言附於作者之後而今之所著白特其
至微淺者耳君在兩州皆有惠愛民思而碑之其在荆
楚尤得士民心君卒即為祠以祀所著有端居興國西
曹郵城濟南西江荆南諸集余欲為會梓成書未果也
君所至學士輒從以講業晚蓋稱丹泉先生云宜人許
氏余從姊也先伯祖刑部府君之孫伯父沂州府君仲
女端靜婉順能通知古賢婦人事雅有慕尚年十八歸
于君事大人相夫子皆有儀法凡歸楊氏二十年如一

日內外稱懿無間一辭年三十九先君一日卒生二男子曰春先春元三女子一適餘姚學生徐銑一許聘吏部主事張君子某一許聘刑部主事王君子某君先娶亦許氏無出始君夫婦相繼卒諸子女皆幼纍纍持二喪歸父母老未克葬今二十四年正月母氏又卒天之禍楊氏其可謂至於此極也君之父即以是年月日合葬君夫婦于某山之陽謂余與君至深命以銘銘曰生之無故其曷畀之嫗謂有以生孰尊尊以傾顛穹蒼蒼

曷以質疑瑰辭琅琅光何離崇宮擊鮮瞑何知矐然白
首樛齒年曷不監是超若遺下何雙宮上并崔重泉幽
扃啟何時何不臻虬躡虹霓浮游紫廷返故棲君曷不
聞我心悲

高廉使墓銘

霍韜

嘉靖丁酉夏湖廣按察司使高叔嗣子業卒叔嗣先清
川人洪武初高有祖曰義徙居祥符遂為祥符人義生
清清生勤勤生珣珣生三男曰伯嗣曰仲嗣曰叔嗣叔

嗣生而慧日誦數千言未弱冠著申情賦殆萬言大梁
之墟文士萃駭曰高氏才子也武皇帝之十四年己卯
舉于鄉嘉靖紀元之二年癸未舉進士任工部營繕主
事調吏部稽勲主事展考功主事陞稽勲員外郎郎中
時崇祀禮成議禮之臣皆進秩有述子業語曰高稽勲
云宜攢議禮者之尸剝諸几又曰高稽勲與人奕伸其
臂毛遂生如施宜生云涓厓子乃為之解曰高云剝議
禮者之尸乃以禮未明也禮明高必不云云又曰高之

臂施宜生之毛舜項之腫之類也烏足異然而年高竟以疾歸又三年起復又明年出泰山而藩政兩告致仕涓涓子與汪太宰言高之才可惜也留焉丁酉之夏子業書來云賴公教遷秩湖臬弗任是惕尚終教我涓涓子復曰第慎之乃踰旬日子業計至矣涓涓子曰高子業與世人交人謂之傲亦宜嘗餞送中丞巡撫於江之滸藩臬同僚曰盍遠詣子業問候吏曰往年詣此旋也子業旋舟返不偕遠詣初入襄陽有撫民副憲者聞

子業至出迓徐徐吏曰盍姑遲待之子業曰子寮長也解纜去已而撫民副憲來子業接之于于如也山西有同僚論事與子業忤疑子業中傷一日集議僚厲聲曰某與某有怨子業復笑不答僚有旁解者曰予聞高君時時稱君之長也僚乃釋然夫遠送中丞同僚曰厚也子業曰吾止諸禮也僚長不候副憲謂副憲地道主也出遲不候禮之節也同僚忌且怨不辯不報量也不知子業謂子業

傲實非也。涓厓子又曰：凡人文學優者，政理自拙。自怠曰不屑。云子業官山西，有代州生員江棹與鄰之人爭宅址，將鬮傷兩族人，致等匿二屍圖誣鄰人。鄰人知不關全昇，以宅棹埋屍室中。數年，棹兄千戶楫狂殺其妻，棹囑妻家訟楫，併誣楫殺致事。楫拷死，無後。棹與弟槃爭襲楫職，訟上巡撫院。付子業鞫焉。子業問棹曰：致等屍何在？棹對曰：楫殺致埋屍其室，不知在所。曰：楫何事？殺致，棹愕然對曰：為棹爭宅址，曰爾與同宅居乎？對曰：

異居曰為爾爭宅址殺人埋屍已室乎有斯理乎問吏
曰搜屍棹室未也對曰未也乃命搜屍棹室掘地得二
屍於棹立所兩跡宛然棹伏罪州人曰十年冤獄也石
州豪吳世傑誣族人吳世江世澤姦盜拷瘦死二十命
世江更數冬不死子業覆獄牘問曰盜賊祇布裙一縠
數斛世江有田若廬富行劫何也世傑曰賊餌色姦問
婦柳曰盜姦若曰姦也何時對曰夜曰夜姦何故識賊
對曰世傑教我賊名世傑伏誣殺人罪祁縣千長趙遠

捕盜起家萬金常縛村民野寺誣為盜得貲逸僕更行
民妻慮其發覺致民縣獄妻列狀上官遠曰民不死禍
且及乃設謫給縣官縣官懼聽遠入獄磔民死擲屍獄
外上官止治遠僕屬罪薄遠罰子業曰安有屬殺人而
長若主不與者乎卒正遠罪涓子曰世言儒不能獄
謂腐也子業通儒能獄不足多也惟是豪民殺人取賄
如趙遠誣縛齊民家累萬金吳世傑構一誣詞殺二十
命有司不察反右焉如是求怨魂不結疾疫不興災變

不流行豈可得哉故為論次子業察獄三事例焉俾有
司知職業之重云爾又曰予讀高子業序薛蕙老子集
解而知異端之禍未息也惜也子業亦惑於老又曰惜
也子業不壽子業而壽必歸中道任重詣極弗可量也
已子業祖某封某官母甄氏娶袁氏皆封淑人子男二
不危不過女三人長適某次聘某次未聘子業生弘治
辛酉十二月十四日卒嘉靖十六年六月十七日年月
日葬某地某原兄仲嗣求銘其墓涓厓子為之銘曰嗟

嗟子業生世三十七才何太過壽何不及疇不惻惻嗟
嗟子業生世三十七亦任冢司亦任藩臬亦最加績嗟
嗟子業生世三十七亦友逖哲亦友邇傑子業德式嗟
嗟子業河洛萃靈子業逖矣盡是友生盡是友生况爾
父兄

翰林院修撰對山康先生狀

張治道

嘉靖庚子十二月十四日前翰林院修撰對山康先生
卒二十四日其弟南川君稍錄其行實以書抵余請為

先生狀以余知先生者曰嗟乎余忍狀我先生耶為狀
他人在稱其德為狀先生在白其誣誣苟未白德將何
稱作志君子採而擇焉先生諱海字德涵別號對山又
號許西山人其先河南固始人其世系顯晦見康長公
行事序述康長先生二子長阜負才夭折其次即先生
先生道亞生知才具經濟讀書不專記誦但通其大義
餘能類融下筆數千言不竭時提學楊邃庵先生竒其
才即以天下士許之其為文脫去近習上追漢魏以詩

經中弘治戊午鄉試壬戌進士第一除翰林院修撰是時孝宗皇帝拔竒掄才右文興治厭一時為文之陋思得真才雅士見先生策謂輔臣曰我明百五十年無此文體是可以變今追古矣遂列置第一而天下傳誦則效文體為之一變朝野景慕若麟鳳龜龍間世而一覩焉修撰一年歸關中三年北上復為修撰其在翰林能面道人過失論古今文藝不少假借一時在翰林者罔不斂手服之又常曰南北人才之用舍天下治亂之所

關也時武宗皇帝初即位宦官用事八黨行權而興平
官劉瑾用事尤專百僚被其竄逐而吾鄉折罰尤甚聞
先生名常欲其至而先生獨不之往瑾以是銜之有時
見直言諷勸在他人不能堪先生獨言之無忌蓋瑾素
重其名自能壓其心耳是時瑾怒吾鄉戶部郎中李夢
陽蓋以夢陽為主事時尚書洪洞韓文卒諸大臣劾瑾
等專恣擅權而彈文出夢陽手朝廷怒罷諸大臣夢陽
官後瑾居司禮忌前彈文構夢陽以他事奏下錦衣獄

欲致之死人情怵怵莫敢拯救夢陽自獄中傳帖甚急

曰對山救我

此帖尚存

編修何柏齋謂衆人曰康對山

若往瑾救之獻吉可活也人以是語先生先生曰我何
惜一往而不救李耶先生先雖承往而人尤難之先生
同御史某往左順門值柏齋自內閣出曰此為獻吉來
耶先生曰是柏齋附先生耳曰此可獨往不可與他人
同也先生遂不之往且謂柏齋曰瑾橫惡肆權人也性
好名可詭言而奪不可正言而論也柏齋曰此惟先生

能之他人不能也又明日先生往瑾所瑾聞先生至倒
屣迎之留飲坐話久之瑾謂先生曰自謂自來狀元俱
不如先生真為關中增光先生給言曰海何足言今關
中有三才古今所希少也瑾驚曰何三才古今希少也
先生曰李郎中之文章張尚書之政事老先生之功業
瑾曰李郎中為誰乃與我並焉先生曰是今獄中李郎
中也瑾曰非李郎中夢陽耶先生曰是瑾曰若應死無
赦先生曰應則應矣殺之關中少一才矣晚飲罷出明

卷之二
三

日瑾奏上赦李夢陽其顛倒小人愚弄奸臣即孟子告齊王謂好貨好色之意而昧者不知論為諛瑾可笑哉一日瑾令親密者謂先生曰主上欲以汝為吏部侍郎先生曰我服官纔五越歲矣翰林未有五越歲而陞部郎者請為我辭之事遂寢而瑾嫌其不附內益銜之一日起文選郎中張彩尚質之京先生謂尚質曰我輩欲去而不可得汝又何來耶尚質曰我見挈高世德恐慘禍及我高世德者吾鄉御史高盾先也為御史有名瑾銜

之挈焉無何尚質陞為吏部侍郎先生曰不來恐禍既
來受官矣曷引病辭耶及瑾坐反尚質下獄中謂同獄
者曰悔不聽康德涵之言尚質為郎中時有進用之勢
一日與先生同諸公會飲尚質盛稱許冢宰之才德先
生曰只要常如此稱其意謂尚質不久為尚書排擠之
意勢所必有無何瑾果逐許矣孝宗時謝閣老遷見知
主上其子丕為翰林編修文亦有名焦閣老芳其子黃
中亦為翰林檢討爭勝于謝各樹黨與互為標榜焦欲

引先生為附一日置酒厚請先生先生往見客座皆邪媚者曰此為排謝招我耶遂正言責之座客皆愧服銜先生者益衆矣是時李西涯為中台以文衡自任而一時為文者皆出其門每一詩文出罔不模效竊倣以為前無古人先生獨不之倣乃與鄆杜王敬夫北郡李獻吉信陽何仲默吳下徐昌穀為文社討論文藝誦說先王西涯聞之益大銜之戊辰先生同考會試場中擬高陵呂仲木為第一而主者置之第六榜後先生忿言於

朝曰呂仲水天下士也場中文卷無可與並者今乃以
南北之私忘天下之公蔽賢之罪誰則當之會試若能
屈呂矣能屈其廷試乎時內閣王濟之為主考甚怒先
生焉及廷試呂果第一人又甚服之無何丁母憂歸關
中往時京官值親歿時持厚幣求內閣誌銘以為榮而
先生獨不求內閣文自為狀而以鄠杜王敬夫為誌銘
北郡李獻吉為墓表臯蘭段德光為傳一時文出見者
無不驚歎以為漢文復作可以洗近文之陋矣西涯見

之益大銜之因呼為子字殷蓋以數公為文稱子故也
若爾非大銜也耶歸闈中居喪以禮哀毀怨慕無何瑾
敗而異者仇者唱言官以鄉里指為瑾黨論先生罷其
官嗚呼先生以修撰罷歸官不加陞阿瑾何謂大抵先
生以才名致謗口語招讒又何論焉又謂先生還家時
被劫有司為追捕其所亡蓋追捕所亡有司素重其名
且為翰林而追捕之也先生何與焉聞者無不驚歎曰
假手折才嫉賢附黨有天乎而先生聞之畧無愠色且

曰自審無疚禍將從人瑾天下大惡也余常憂其禍國
今果敗論死矣深為國家慶也余官何惜余官何惜罷
官後一切國家事罔論葛巾古服放情山水為文讀書
造日益精學日益充又常曰為官化民為宦化俗欲化
民俗先敦族黨族中長者敬幼者育窮者周顛者扶無
親疎遠近皆得其歡心而數弟顯達成名皆先生教導
訓誨之力具於鄉黨處之以仁義接之以禮敬人有爭
者不之官而之先生求其決判而先生別其是非論其

曲直雖數年之爭罔爭以至給人困乏婚喪不得舉者
貲助之俾無不舉余在告後值父喪困不能葬先生聞
之適有先生相識以百金餽者先生完封遺余余固辭
弗受先生曰余大事畢矣得此不過日用費耳何若助
吾弟喪余固再辭之先生曰賻喪故遺授受有名非假
借討償耳曷辭焉余不得已受之遂克葬事其敦友
之義周人之急事悉類此又日與故舊童冠徜徉詠歌
雖身居小縣而名動四方求文者日踵其門碑版傳刻

天下為徧家居三十餘年探聖賢之學別王霸之道以
至物理性命篆隸巫卜無不克講洞曉常與予論曰道
以無定為真學以適用為是文以達質為良三代堯舜
罔有不同至有宋以來執一以為道訓詁以為學庸冗
以為文論其學則有適其用則無講一身之行為似是
救國家之急難則非也觀乎此言非振古豪傑天挺獨
出者哉家居不離聲妓管絃絲竹一飯必用人或議之
不知大節所關凜不可犯先生少時夜行家園中值園

牆傾有鄰女子奔先生先生正色斥之鄰女走不敢近
此與柳下惠何異焉為學道披玄門識該宗旨議論如
孟軻為文類馬遷詩以興致為先格高詞俊凌駕古人
樂府數百篇可羽翼騷雅使遭時用事管晏不足為伊
傅不足追也夫何厄塞不遇終老以歿是天未欲振耀
斯文俾先生厄塞不遇終老以歿也距生成化乙未六
月二十日享年六十有六先娶尚氏有丈夫行持家訓
衆極有規度雖先生亦敬畏之生男子粟為縣學生

卒女子三一適華州舉人張之槩貞烈剛明如母尚
氏之槩亡生子光孝為廩膳生次適生員李世貞次適
監生馬襲古繼張氏側室楊氏李氏俱無出韓氏生子
椿趙氏生子挺張氏歿立李氏為適主家事而楊氏副
焉將以某年開月開日葬嗚呼先生之言行可誦說者
尚多余不能悉悉其所知者耳聞鄆杜王漢陂為先生
墓碑三原馬谿田為先生志高陵呂涇野為先生墓表
咸寧許少華為先生傳而先以狀誄委余前四君子皆

先生所厚而王馬呂又先生同業同朝其知先生事又真且多也其為碑為志為表記載傳述必有出余狀次之外俾先生行為之良不至遺失無傳可也余與先生交二十餘年矣授旨開方被教良多余時或有所論議亦必採擇聽受人有一善雖一介鄉黨之士亦稱賞取法人有不善雖公卿權貴之人亦面斥之不貸不逐好以違情不黨同而伐異此雖堯舜三代之時恐不能用况末世薄俗直道難行而欲取大位建大功以求如古人

之所為不亦難哉不亦難哉常聞先生對孝宗皇帝曰
使古今豪傑之士而不遇雖子思孟軻之流則亦徒耳
今觀先生之出與處則前所云子思孟軻者其亦自謂
也與其亦自謂也與

太學生丘君行狀

蔣冕

君姓丘氏諱敦字一成號必學齋大宗伯深庵先生之
冢子也先世閩人在宋官於瓊始占籍瓊山曾祖諱普
臨高醫學訓科鄉稱思貽先生祖諱傳不仕俱以先生

貴贈禮部尚書曾祖妣柯氏祖妣李氏居孀不二朝廷旌為節婦俱贈夫人母吳氏累封夫人先生生子多不育年四十始生君於京師君生有異質自幼莊重寡言笑不好弄於凡兒童嬉戲之具一不接于手與儕輩羣居端坐竟日或公肆戲侮亦視之如無對人未嘗自有所言問之亦多不答就學家塾中師授以書雖少僅百十言讀數十遍亦不能成誦蓋其心已了了特口不習其辭耳衆見其然遂疑為不慧雖先生亦不之察也先

生恒言人家仕宦不常而生業不可廢方居太夫人憂
還瓊山將起復北來時從子二人尚幼先生庶生二稚
甫能言皆聰悟絕倫將他日諉以書香之托君在諸子
姪中為最長遂以世業畀君留侍吳夫人居佐伯父
訓科公奉宗祀先生遂行方先生行時訓科公故無恙
君所以事伯父一如事先生者而訓科公以君簡默猶
疑其果不慧他日見君綜理家政一一悉中度始知其
不凡由是事無鉅細必質問而後行有所經畫多出人

意表訓科公又大驚恨知君之晚臨終呼至前盡付以
後事訓科公既卒一切喪葬事悉據先生所訂家禮儀
節以行客有來弔祭者見君舉措中節無過舉無廢事
咸嘖嘖稱歎蓋至是始知其有隱德云既免訓科公喪
家無經紀之僕君多主家事鄉人多無賴貌其幼弱公
肆侵犯君處之自如方汲汲自奮于學素苦多疾先生
又北上鄉郡間一時學者多惟舉子業是務四子一經
外漫不加省君左顧右盼無所適從未嘗不茫然自失

也於是困臥書樓中日取先生所留書閱之若不識字
惟以意會久之因其所已通以達其所未通恒謂人曰
人之於字皆先識音而後知義余則因義以求音於是
先羣經次諸史又次子集下至稗官小說晝夜不釋手
或三五日足至樓下慨然以老泉自期夜夢見一儒者
與之談皆經史與義問之知其為東萊呂成公也覺而
深有所感發由是一意聖賢之書有寤寐不忘之意焉
自謂筆路尚生於文章家修辭之法患不得其蹊逕又

摘出諸史書泛觀廣覽至興衰成敗之際輒反覆究玩於凡一代顛末一君始終皆撮其行事而以聖賢理道斷之如史家之贊辭云者橫豎穿貫上下數千載間由是博極羣書而藻思日以逸發矣君自視欲然方幸人不見知鄉邑賓友胥會當衆論叟叟之際獨塊坐如土木偶人禁不出一語退而自歎曰大丈夫生天地間當與天下豪傑角何至從鄉里小兒輩競銖兩毫末於頰舌之間哉是時人雖不知君而君獨明于自知故其自許

如此壻文昌韓氏魏國忠獻公之裔邦鉅族也壻其門
將期矣婦翁猶不之知意君必失學見君至每令幼童
以對句及舉業破題試之輒不應一日賓客會其家命
題賦詩獨不及君婦翁數視君而色甚愧已而以椰子
為題或戲君曰盍賦此君援筆成唐律似略不經意婦
翁喜其速命數十題詩皆立就每詩成輒飲飲多至三
十餘觴不亂由是隱然名動郡邑間部使者某公問先
生三子優劣於瓊之舉子率爾應曰二稚慧甚長者殊

憤憤爾部使者亦謂信然會與君言異之時將舉兵征黎因問征黎利病君區畫精當而議論英發部使者愕然語座中人曰某言丘公之子憤憤公之子豈憤憤哉彼言者乃真憤憤爾素不事請謁家居近郭無故足不履城市非有事未嘗涉迹公庭藩臬有按部至瓊者不肯輒先趨謁或為先生來視即日投刺報謝時事不一挂口問之亦不對或有所詢叩至數四察其心果誠乃更為之委曲詳盡焉聽者心服親舊有事于州司覲得

君片言為助不可當路以先生故重君不事干請或誘之言終亦無所言方伯某公按瓊謂君曰有事不妨來言諾之而不復閱月召君問故對曰敦素不習此故人無來託者他日某公詢諸郡縣果然歎曰丘先生可謂有子矣有某某者守瓊見先生素不預公府事遂欲啗君以利因陰結于先生間遣其子語君曰鄉人苟有訟事能餽君五百金者盍為之解紛乎應之曰此言何為至於我尊公但循廉則闔郡皆受五百金之賜奚必敦

哉其人歸語其父甚慙語人曰丘氏父子相似蓋尤君之太峻也始君之居鄉州司見君不肯趨謁惡其簡禮姻舊不為解紛怒其不情君耿耿自信持之終不變厥後州司樂其不侵擾姻舊安其不偏矯因更翕然賢之海外俗尚侈巨室子弟出遊多乘馬張蓋君獨徒步徐行不輟當街衢中道遇諸塗者望而知其為君也初先生北來獨攜二稚侍行未幾相繼殤亡始以書召君來侍久之君不至先生恒以書香為憂每道及二稚幼慧

事輒悲慟不自勝雖時時數聞君進德徒以久不之見
尚未測知其淺深君時作一書達先生書幾萬言大槩
論家事而偶及高雷治河事其言曰此河一成即有無
窮之利然使區處乖方則恐無其利而先受其害元人
治河因之名亂往事蓋可鑒矣先是高雷有故河遺迹
先生欲開通之以便舟楫而任事者或因之擾民故君
書及之故大司空謝先生見君此書驚謂先生曰此子
當世公家學何可使之獨學無友乎先生由是屢書趣

君來成化甲辰夏始至自瓊山初君歸瓊山甫十齡又
五年先生列文北來前後十二春秋而父子始相見至
是君之齒亦二十有四矣既朝夕侍先生左右日聞所
未聞於是所見益恢弘矣居亡何朝廷以先生官三品
錄君為太學生時先生方主教事門下諸生數千人君
避遠形迹不妄交一人遇有所往獨自策蹇挾一僮以
行羣然埃壘中雖諸生不識其為先生子也是時當塗
用事者多緣子敗君因作詩以志戒有近世大臣多子

敗而繼之以肥馬輕裘真桎梏明憲隼几即山林之語
聞者賢之始君於羣經尤好春秋傳時給事中安成劉
君孟進士新安唐君弼在太學諸生中皆以業春秋知
名先生間遣君從二君習舉子業資進取非其好也會
京闈秋試黽勉一入場屋既不第歸笑自謂曰區區舉
子業曷足以溷吾乎盍屏諸於是經史百家之言歷代
帝王治天下之法度與凡禮樂兵農天文地形律呂星
厯以至醫卜筭數之說益無不研究焉而於典故沿革

世家爵里考覈于近代以至我國初者為尤詳慮其遺
忘有所得即書疏之于冊蓋自是絕無進取之意矣君
自幼未嘗一日去母夫人側既遠別蚤夜思之不置欲
歸則先生不可恒鬱悒不自聊時發憤歎于詩歌來京
師無幾即得疾疾甫愈復作在京師六寒暑而疾居其
多疾作時輒不喜見人人有來問候者雖姻舊或父執
長者亦罕得其一面惟困坐一室中日掩關焚香以誦
讀著作為事雖盛暑鑠金猶口談手校不輟蓋君惟恐

學不進名沒世無聞而不知其身之既病而將死也方
疾之復作也飲藥輒不效京師諸醫大率多泥東垣丹
溪之說而不得其妙用藥往往無近效君自謂深於醫
道獨不能診脈耳於諸醫舉庸視醫每進藥多疑不肯
服即服之亦不過數劑即止已而更一醫復然疾勢殆
不可為而歸心尤切少間先生漫遣之歸君甚喜旦暮
躬治任且未嘗一日置書不觀形日益尪羸而著作不
廢疾遂增劇而卒時弘治庚戌五月十三日也距其生

天順庚辰六月六日得年僅三十有一君之學以積思
自悟為主有所疑必思方其致力於思也或終日凝然
如癡繼以通夕不寐雖疾病呻吟中而苦心自若也其
軀幹似不能勝衣而勇猛精進毅然不可奪沈潛玩索
蓋將斃而後已故其學無所不窺下至釋氏書亦能悉
其精微間出以示人有觸其機鋒者肆口辨詰傾河瀉
海不見有窮竭態予每親見其然雖深于其學者亦或
難之其才奔迅奇健為文多不起草當喧溷倉卒間若

不致慮睥睨而起落筆如飛馳頃刻數百言詩雄爽善用事每酒酣耳熱逸興頓發拈筆向人覓題一揮殆數篇多有不經人道語初過南安華亭張汝弼為守一見奇之目為小坡蓋擬之於東坡之後身也識者不謂其溢美然君雅自慎重有所著作不肯輕示人雖先生父子間亦未嘗盡見之蓋用心於內者其道固然與既卒侍史出其遺稿于二鉅篋中始得雜文若干卷古今詩若干首發蒙論一卷凡數十篇所著書號醫史未嘗稿

者四十六冊他所輯錄者尚多皆未及成書君於醫家書獨酷嗜素問一書宏深浩博而每病讀者之難間閱丹溪所作讀素問批點凡例而增補訂定之以為新法按其法以求其書久之若有所得迺探其源委審其脈絡章分而句釋之僅成十數紙如上古天真論四氣調神大論諸篇多有發舊註所未發者又先生嘗病瓊僻處一隅文獻無所於稽恒欲於古今載籍中採其故實之有涉于瓊而可資見聞者會萃之以成一郡之書不

果君奉庭訓唯謹每繙閱簡冊遇可錄者悉手錄之積
久成數帙編題甲乙以識別將攜之南歸欲用數年之
力詳搜精覈以成先生夙志瓊人士謂此書若成郡自
有志以來所無也至今咸以不覩其成為憾其所謂醫
史書雖未及成而規模次第大略可考見其意蓋病世
醫外方書古法而惟以醫者意也之說藉口肆意妄為
以冀其一中故其言曰公輸不外規矩而巧師曠不外
六律而聰醫之道亦然蓋必先知法而後可以言意

意生於法而亦不外於法舍法而言意則蕩舍意而言
法則拘雖不中亦不遠蕩則無所不至故與其失之蕩
也寧拘素難本草暨諸名醫著述與其所行之事跡非
醫家之規矩六律乎於是上溯農黃下迄金元以來稟
錄而辨析之論病以及國原證以知政治疾必先治心
明術必先明理會衆說以成一家言有史道焉故名其
書曰醫史其書有本紀有表有攷有列傳大畧如史家
書以為易有太極是生兩儀兩儀生四象四象生八卦

八因於八而成六十四卦易道備矣易主卜筮卜與醫
皆民用所資不可一日無者其道一也易有君子之道
以制器者則尚其象故虛一以象太極著本紀二以象
兩儀表四以象四象考八以象八卦列傳則象六十四
卦之數本紀則神農黃帝表則運氣五藥之類考則醫
書職官醫器服食攝養之類列傳則岐伯扁鵲而下以
至國初諸名醫既自序其著述之意而於其篇終復曰
予述此書總四
八篇七與八皆少數也老變而少不

變用少而不用老然則此書其終不變而遂無用乎吾道窮矣其兆蓋先見矣嗚呼悲矣其運氣表曰醫時錯六氣于五運所以參天地之機補造化之缺者也蓋運有五金木水火土是也氣有六燥暑風濕寒火是也天以六為節故氣以六期為一備地以五為制故運以五歲為一周五氣平則生物遂五氣乖則生物苦蓋陸產生于氣猶水族生于水也生于水者病于水故水清則魚勞水敗則魚病水毒則魚死生于氣者病于氣故水

氣勝則風氣流行脾土受邪民病餐泄火氣勝則炎暑
流行肺金受邪民病痰瘧而水火亦由之變徵動植亦
因之榮悴故曰天地之道寒暑不時則病風雨不節則
飢又曰土散則草木不長水煩則魚鼈不大氣衰則生
物不遂聖人有憂之觀法天地把握陰陽遠取諸物近
取諸身順八風之理處五行之用步運行於機式稽變
化於度數而運氣制焉是故從其類序分其部主別其
宗司調其氣數之偏反其和平之化使之剛氣不怒柔

氣不懾天道既順民氣可調五運適于平而無害於人各成其功不相奪倫此非所謂參天地之機補造化之缺者乎左氏載醫和之言曰天有六氣降生五味即此五運六氣之數蓋與大易洪範月令同一致也非天下之至材其孰能與於此邵子嘗言素問于術之理可謂至矣其殆謂此類與夫氣運猶歷法也久則不能無差歷法之差則既隨時修改以與天合然後寒暑不爽而薄蝕可知矣自有運氣歷法以來數千百載于茲歷法

之差不知其幾修改矣而運氣猶故也夫一日之頃而涼溫異候百里之近而雨暘異若欲持一定之法以應無窮之變安望其能相入哉故敦阜之紀未必風雨大至鱗見於陸也委和之紀未必天地淒慘日見矇昧也姑以宋論之元豐四年歲在辛酉推以彼之術其說以為陽明司天是為上商少陰在泉是為下徵故其應則當天氣燥地氣熱運為少羽歲水不及名曰涸流之紀是歲河決大水與其所名紀曰涸流者異焉或以此難

胡源源雖辨之甚力而卒亦有不可証者素問黃帝問
於岐伯曰夫子之言歲候不及其太過而上應五星今
夫德化政令灾眚變異非常而有也卒然而動其亦為
之變乎答曰承天而行之故無妄動無不變也卒然而
動者氣之交變也其不應焉故曰應常不應變是固然
矣陰陽有勝復也常變恒因仍也豈一於變哉何後世
常之少而變之多也無乃亦積歲一差積之益甚天日
新運法猶舊天左故其應難稽乎是非聖人之法有不

足徵也蓋繼承纂述之無其人也至於今日其弊滋甚
忽於本而致詳於末舍其大而徒牽強附會支離決裂
幸其一之偶中而遂恣神其說焉不亦大惑乎泥者至
云某生人於某日某經病者治以某藥按圖膠柱其謬
甚矣故程子曰氣運之說堯舜時十日一雨五日一風
始用得而褚澄亦曰陰陽多端未易窮也道術破碎未
易知也簡編不全未易依也不若先論病能守經隧一
本諸人事之為近也素問有曰知其要者一言而終不

知其要流散無窮此之謂也而古者名醫所以亦往往置此而不之論與雖然體天地法四時別陰陽順人性其理蓋亦有不可易者醫而忽此曷足為醫乎是論次其槩以備觀覽焉其書中又有三因說又論李明之不准古方以治病言皆有補於世三因說曰病有三因其說尚矣然又有因於天因於地因於人者豈但內外因而已周官有云四時皆有癘疾春病首夏疥秋瘧寒冬嗽上氣此非因於天者乎仲長統昌言有云北方寒其

人壽南方暑其人夭此非因於地者乎韓詩外傳有云
國無道則癘風疾雨夏寒冬溫故民多疾病而羣生不
壽月令孟春行秋令則其民大疫凡此之類豈非因於
人者乎因於天者醫經有五運之方可以治之因於地
者醫經有五方之治可以療之獨因於人者醫經缺焉
嘗求後世之方書惟張子和李明之畧有其說子和之
言曰瘧疾嘗與虐政並行或虐政行于先而瘧氣感于
後或瘧氣行于先而酷政應于後治平之時其民夷靜

故瘧疾常少擾攘之時其民勞苦故瘧疾常多元好問
序李明之所著書謂汴京被圍五六十日間為飲食勞
倦所傷而歿者將百萬人當時皆謂由傷寒而致後見
明之辨內外傷及飲食勞倦傷論而後知世醫學術之
不明誤人乃如此二說皆有裨于醫術然醫能治之于
已然其惠小君相能治之于未然其仁大嗚呼明君賢
相勿使人瘧其勿使人疫死於飲食勞倦其勿使小道
曲藝得行其私惠哉其論李明之曰明之嘗言古方新

病勢不相入故其為人治病候其脈既乃斷之曰此某證也然後執筆處方命藥一切撰于臨時而不用其故以為病證無窮我亦與之無窮欲以一洗世醫按圖膠柱之固武帝欲教霍去病兵法去病辭曰顧方略何如耳何至學古兵法夫古今異勢敵情萬變而無窮苟不能通變而惟古法之拘其不與尸也難矣去病可謂知兵者明之之知醫何以異於去病之知兵然業醫者不能皆明之也脈未必能如明之之精證未必能如明之

之審而亦效明之之為恣睢杜撰不能去人病而反以益病者安保其能必無也故苟未有李廣之才則不若守程不識之法之為愈如是者十數萬言辭多不錄其曰發冢論蓋取蒙莊氏詩禮發冢之義而托名於兀該拙卜古溫是六言者蕃語也譯以華言謂無是人蓋用漢賦亡是公之例其大略以為古者政龐民淳官無文武內外之分後世政繁文武始歧而二之迨世道日汙於是又分而為三矣其歧而為二也如車之有兩輪去

其一則脫輻矣其分而為三也如鼎之有三足折其一則覆餗矣今既不能合其岐而二之文武而顧欲去其分而三之中官豈不難哉中間又有宦官讀書不讀書之辨大約如漢書韓安國王恢擊匈奴議凡十數段其終篇又設為甲乙辨詰之詞略云甲與乙交莫逆異內外辭曲直乙曰人之勇者腐之則惡馬之壯者腐之則良人腐則鬚脫雞腐則尾長何為相反也甲曰人土屬而體陽其陰在勢去其勢則陽亢矣故惡馬金屬而體

陰其陽在勢去其勢則陰純矣故良人表陽而裏陰陰傷而鬚脫者伐其根也難表陰而裏陽陽損而尾長者力之專也乙曰宦者無鬚醫經以為去其宗筋傷其衝脈血瀉不復皮膚內結脣口不榮故鬚不生然與甲曰不然夫鬚之有無天所以別陰陽殊內外也首楞嚴經列十官之目紫微帝垣有宦官之星何莫非潞涿君也豈皆去宗筋而傷衝脈之故哉乙曰宦官可去乎甲曰宦官禎祥也禎祥何可去也乙曰汙穢人君德濁亂人

朝綱殘賊人忠良渙散人民心喪失人天下此為禎祥
孰為妖孽甲曰自古創業垂統之君為之防範維持之
慮至周至悉矣繼承之者苟非大無道則國勢未易搖
也雖歷數有歸而人衆勝天無資以作於是熒惑降精
下為宦豎依阻城社人亦不能勝而天下亂矣然後瞻
烏爰止景命維新焉譬之猛獸物莫能撓反為毛間蟲
所困然後斃於物也是故漢之興也趙高蠹秦魏之造
也常侍蠹漢梁之篡也北司蛆唐是秦之趙高漢之常

侍唐之北司乃漢乃魏乃梁之禎祥也天降禎祥為興國瑞又可去乎乙曰國家將興固有禎祥然齊宮之刺投河之辱千百輩盡誅之慘人生亦不幸而為禎祥哉甲曰夫宦官拔迹糞壤之中致身霄漢之上可以將可以相可以聖可以賢可以仙可以佛蓋無往而不可禍患其變也禎祥其常也君子語常而不語變乙曰請得聞之甲曰內握禁兵外監方鎮成功賞則先敗績罰弗及非可以將與圖謀帷幄寄之國命濁亂天下弗受其

責非可以相與佞子貢媚擬倫伊霍陞座講易係藉聖
賢非可以賢與附之者白日飛昇忤之者生入地獄非
可以仙可以佛與時又或能廢置人主呵叱天子則遂
可以為上帝矣雖衰兇鞠頑終底滅亡然又足以快天
下心攄天人憤為興王之資垂後世之戒亦不徒禍矣
庸何傷如此者亦數千言君嘗謂予曰予為此論乃癡
人說夢中事也夢者固癡矣安知聞人說夢者亦不癡
其人哉夫天下之事心有所蔽則以惡為美以非為是

以害為利者多矣古人不云乎箕糠眯目則天地四方
易位自是其是者蔽於所見但見其是而不知其非人
一切有言舉不能入自非為之說者逆探其所料指摘
其所信推極其所期竭兩端而盡之凡彼所以為之地
者一一皆豫為之言若彼之自為言者又曷足以感悟
其心也邪予為此論意蓋出此雖然天下事可言者多
矣何獨論此哉殷鑒不遠在夏后之世事莫急焉故也
君又嘗著論辨公山不狃之非畔其言曰公山不狃以

費畔召子欲往程子曰聖人以天下無不可為之事亦無不可改過之人故欲往雖然弗擾之畔畔季氏耳非畔魯也封略之內誰非君臣大夫跋扈家臣起而逐之以張公室季氏烏得以畔名之哉迨仲尼行乎季孫將隨費不狃率費人以襲魯蓋未喻乎聖人之志妄動以取戾也其出奔在吳吳將伐魯問于叔孫輒曰魯有名而無情伐之必得志焉退而告不狃不狃曰非禮也君子違不適讎國未臣而有伐之奔命焉死之可也所託

也則隱且夫人之行也不以所惡廢鄉今子以小惡而欲覆宗國不亦難乎若使子率子必辭王將使我王問不狃對曰魯雖無與立必有與斃諸侯將救之未可以得志焉晉與齊楚輔之夫魯齊晉之脣脣亡齒寒君所知也不救何為吳伐魯不狃率故道險魯是以不危夫不狃以畔亡之餘而處心尚能如此賢于人遠矣孔子之欲往也詎無意夫况其據邑以畔不召畔人逆黨而顧夫子之召今夫人有一非理之事鄉里有自好者不

欲使之知焉况以畔名乃敢召吾夫子邪必其志有所
在言有可執焉耳聖視天下固無不可為之事無不可
改過之人至堅至白無所磷緇亦何至助畔逆之事黨
大惡之人邪於是乎必有以諒之矣而曰夫召我者而
豈徒哉如有用我者吾其為東周乎噫畔逆之人能革
面效順亦既多矣而欲因之以興周道于東方焉則所
以望之者侈矣或曰子路為季氏宰則墮三都乃心罔
不在公室也使不扭而有張公室之心固子路之所願

也亦不悅焉何也曰甚矣風俗之移人也王室衰諸侯橫為大夫者不敢忠于王室諸侯弱大夫肆為家臣者不敢忠于公室故長弘興周史臣著其貶家臣死黨舉世以為賢當時列國魯號秉禮昭公之十二年南蒯與公子慙謀逐季氏昭公與焉其鄉人有知之者歎曰家臣而君圖有人矣哉迨昭公伐季氏叔孫氏之司馬曰我家臣也不敢知國救季氏而昭公孫則是舉國臣民惟知忠於所事矣當時諸侯齊景為賢南蒯奔齊景公

曰畔夫對曰臣欲張公室也子韓皙曰家臣而欲張公室罪莫大焉則是天下諸侯不以背公為罪矣風氣相扇上下相師背公死黨之心盛愛君忠國之念消致人主孤立於上大夫強橫於下公室欲張而不得篡弑削弱之禍相望於世雖以聖門高弟或不暇知其非也故顓臾近費冉有興戎孔子欲往子路不悅此則一時風俗之移人耳然則畔不為非與曰臣而畔君固不得為欲張公室則未可深非也後世莽操炎裕之徒其黨有

舉兵而欲誅之者君子固與之矣昔者安祿山數顏杲
卿我奏汝為判官不數年超至太守何負於汝而反杲
卿曰天子何負於汝而反我世為唐臣官爵皆唐有雖
為汝所奏豈從汝反耶我為國討賊恨不斬汝萬段何
謂反也祿山不得反杲卿則李氏豈得畔不狃哉不狃
非畔則孔子之欲往也固宜於佛肸也亦然然則何以
卒不往曰不狃之張公室亦桓文之獎王室耳其他議
論多類此君卒時庶弟京僅三歲所生二子長黃僅五


歲幼旬亦三歲時先生之年暮蓋不勝宗祊之慟也得君著作不忍讀終一紙天下大夫士無論識與不識莫不聞而悲之君雅好儉素雖生長富貴中自奉養率如寒士少時不肯著新衣客至吳夫人強之然後著客甫出門亟麾去或問其故曰無他吾特惡其華耳蓋淡泊之性自幼則然矣見利顧義辭受無細大必謹方伯陳公士賢先生考會試時本房門生也因君北行贖白金二錠遣人致辭曰某平生不餽遺人徒以老門生之故

故破戒為此郎君其勿卻君愧其辭不受陳自愧失辭
亟謝過往返數四竟不受陳歎息而止治家嚴明有法
度臧獲數百人見之凜然無一敢涕唾者與人交任真
無鉤距是是非非明白無回護然剛中少容觸物不平
輒勃勃形詞色間遇人一語不相入即兩目左右視若
寂然罔聞者甚則徑去弗顧不善效時俗俯仰見人委
曲巧媚態疾之如讐絕不交一語每自訟以為過激終
亦不能改也然外雖嚴毅中有惻隱心每欲修先曾祖

思貽公掩骼埋胔故事往往施德於不報北來時嘗夜宿會通河舟中夢至一江岸旁有古墓土為水所嚙其棺石也盡露而缺其一方明日過一處儼然夢中所見也亟戒徒掩以土仍欲求楮幣酒漿致奠而舟已不可留猶以不及致奠為恨其所娶韓氏無子既抵京先生深惟嗣續計欲為納側室君以娶妻未久情有所不忍因固拒閣老徐先生聞君言呼之至前責以義申論至再三始黽勉從命納徐氏生二子女三某韓出君來後

二年殤亡某媵某氏出今九歲某徐出今五歲嗚呼以先生之仁而不能壽君以君之賢而不能自壽茫茫者天吾又安從而詰之乎使天少假君以年其所就當有大過人者而乃止于斯也豈但君身一家之不幸哉予從先生學最久與君相得甚歡間嘗為予道其少年事皆歷歷可敬病中又手書平生立身行己之大端易箒時將持以授予不及與君訣其意蓋有所託也君卒既踰期其柩亦歸抵瓊山而懿行未白幽冥之中負此良

友多矣情雖不忍書而義則不可不書因即所見聞暨
得諸君之鄉人而信者次為事狀一通凡君之世次言
行與其著述之有關世教者皆載焉謹錄以求銘於當
代立言者以紓先生暮年之悲以慰君之靈于地下辭
繁而不敢畧者蓋專有待于筆削也弘治四年六月十
二日友生蔣冕狀



明文海卷四百三十三